

11.April. 2019

UPA2019/193 aamma UPA2019/221

UPA2019/193

Piniakkanik killilersukkanik ukiumi pisassiiffiusumi Qilalukkanik Qernertanik Qilalukkanik Qaqortanik aammalu Nannunik, ukiup qaammataani qaammatit marluk December-imi Januar-milu pisassiiffiujunnaartinneqarnissaannik Naalakkersuisut peqquneqarnissaannik inatsisartut aaliangiiffigisassaattut siunnersuut.

(Inatsisartunut ilaasortaq Karl Kristian Kruse, Siumut)

UPA2019/221

Piniakkat killilersukkat avanersuarmi Ittoqqortoormiunilu Qilalukkat Qernertat Qaqortallu, Aaveq aamma Nanoq pillugit periarfissaqarnerseq misissuisoqassasoq, kiisalu sunik suliniutinik killilersuisoqarunnaarnissaa pillugu Naalakkersuisut UPA2020-imut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Jens Napatok, Partii Naleraq)

Piniagassat Killilersukkat Qilalukkat qaqortat qernertat nannullu qaammatini marlunni december-imi januar-imi pisassiiffiujunnaartinneqarnissaannik Inatsisartut aaliangiiffigisassaattut sinnersuummut, Inatsisartuni ilaasortamut Karl Kristian Kruse-mik siunnersuutigineqartumut aammalu

Piniakkat killilersukkat Avanersuarmi Ittoqqortoormiunilu qilalukkat qernertat qaqortat aarrit aamma nannullu pillugit misissuisoqassasoq, kiisalu killilersuisoqarunnaarnissaa pillugu Naalakkersuisut peqquneqarnissaannik Inatsisartut aalajangiiffigisassaattut siunnersuut Jens Napatok-mit siunnersuutigineqartoq, Siumumiit siunnersuuteqartut qutsavigaagut imaattunillu oqaaseqarfigissavagut.

Silap pissusiata allanngorartuarnerata aamma killilersuinerujussuup piniartut eqqornerluttarpai tamannalumi assut apeqqusersorneqartarpoq, uumasorsiuut piniartullu ilisimasaasa ilaatigut imminnut akerleriissinnaasernerat arajutsisimaneqanngilaq.

Nunarsuarmioqataanitsinni maannamut killiffippat nalilersorneqartariaqarpoq, tassa Nunap inoqqaavisut immitsinnut taagorluta imaluunniit Nunatut namminersortutut taagorluta nammineq Nunatsinni pisasseeriaseqassanerluta Nunat allat apersorqaanngikkaluarlugit.

Ilisimatuussutikkut pisasseeriaseq uumasorsiuut piniartullu ilisimasaat aallaavigalugit pisassiisarneq Siumut tunngaviumik tapersersugaraa, piniartut ilisimasaat anertuneruumik atorneqartariaqarput aammalu uumasorsiuut kitiseriaasiat misissueriaasiallu naleqqussarneqartariaqarpoq.

Piniartut sumiiffinni ilisimasallit kisitsinermi misissuinermilu atorneqartarnissaat uumasorsiuunut peqataatillugit piumasaqaatinngortinneqartariaqarpoq.

Piniartullu sila imarlu atorsinnaagaangamikku angalajuartartut angalatillutik uumasorsiuut qaqutigorujussuaq sumiiffinni ataasiakkaani naammatoorsinnaasarpaat, taaneqartut kingulliit tassaapput pisassiisoqartillugu aallaavigeneqartartut annertunerpaamik.

Siumumiit piffissanngorsoraarput allatut nalilersueriaaseq misissueriaaseq kisitseriaaseqarnerlu ingerlanneqartalissasoq, tassami ilisimasat annertunerusariaqartutut nalileratsigu, Nunap immikkoortuinik ilisimasalinnik piniartunik uumasorsiuut ilaqartillugit kisitsisarnermi ingerlalernissaa piumasaraarput.

Tamaatullu aaqqissuussinissap kingunerissavaa annerusumik aningaasaliisoqarnissaata avaqqunneqarsinnaannginnera.

Pisuussutitsinnut uumassusilinnut tunngassuteqartut paasissutissat annertunerpaat pigilerutsigit taava ersarinnerusumik takusinnaalissavagut qanoq pisassat annertutigisut tuniuneqassanersut.

Nunarput tamakkerlugu piffikkaartumik soorlu assersuutigalugu piniarfik 1, piniarfik 2, il.il. nalilersoqqinneqartariaqartoq Imaaniuppat aamma Nunamiuppat Siumumiit isumaqarpugut, tassami piffiit ilaanni nungunneqanngitsut piffiit ilaanni nunguttut.

Taamatut oqaaseqarluta siunnersuut Aalisarnermut Piniarnermut Nunalerinermullu Ataatsimiitaliamut ingerlatipparput.

Henrik Fleischer, Siumut